

## 15-bob. Erkin ombor

### 100-modda. Erkin ombor bojxona rejimi

Erkin ombor bojxona rejimi shunday rejimki, bunda tovar muayyan joylar va hududlarda bojxona to'lovlari to'lanmagan hamda iqtisodiy siyosat choralari qo'llanilmagan holda joylashtiriladi.

### 101-modda. Tovarni erkin ombor bojxona rejimiga joylashtirish talablari va shartlari

Erkin ombor bojxona rejimiga har qanday tovar joylashtiriladi, bundan bojxona hududiga olib kirilishi taqiqlangan tovar hamda ushbu hududdan olib chiqilishi taqiqlangan O'zbekiston tovari mustasno.

Boshqa tovarlarga zarar yetkazishi mumkin bo'lgan yoki alohida sharoitlarda saqlash talab etiladigan tovarlar maxsus moslashtirilgan binolarda saqlanishi lozim.

Ilgari boshqa bojxona rejimlariga joylashtirilgan tovarlar erkin ombor bojxona rejimiga joylashtirilishi mumkin.

### 102-modda. Tovarni erkin ombor bojxona rejimiga joylashtirish uchun zarur bo'ladigan hujjatlar

Tovarni erkin ombor bojxona rejimiga joylashtirish uchun deklarant bojxona organiga bojxona yuk deklaratsiyasini va tovarning kuzatuv hujjatlarini taqdim etadi.

### 103-modda. Erkin ombor bojxona rejimiga joylashtirilgan tovar bilan amalga oshiriladigan operatsiyalar

Erkin ombor bojxona rejimiga joylashtirilgan tovar bilan quyidagi operatsiyalar amalga oshirilishi mumkin:

tovarning o'zgarmas holatda but saqlanishini ta'minlash operatsiyalari;

tovarni sotishga va tashishga tayyorlash operatsiyalari, shu jumladan turkumlarga bo'lish, jo'natmalarni shakllantirish, saralash, o'rash-joylash, qayta o'rash-joylash, tamg'alah operatsiyalari (aksiz markalari bundan mustasno) va boshqa shu kabi operatsiyalar;

oddiy yig'ish operatsiyalari;

tovardan erkin omborda ishlatiladigan texnologik uskuna va uning ehtiyot qismlari, yuklash-tushirish texnikasi, boshqa texnik vositalar sifatida foydalanish operatsiyalari.

Erkin ombor bojxona rejimiga joylashtirilgan tovar bilan chakana savdo operatsiyalarini amalga oshirishga yo'l qo'yilmaydi.

Erkin ombor bojxona rejimiga joylashtirilgan tovar bilan ayrim operatsiyalarni amalga oshirishga qonun hujjatlariga muvofiq taqiqlar va cheklovlar belgilanishi mumkin.

#### 104-modda. Tovarning erkin ombor bojxona rejimida turishi muddati

Tovar erkin ombor bojxona rejimida cheklanmagan muddatda turishi mumkin.

#### 105-modda. Erkin ombor bojxona rejimida bojxona to'lovlarining va iqtisodiy siyosat choralarning qo'llanilishi

Erkin ombor bojxona rejimida turgan tovar erkin muomalaga chiqarish (import) yoki eksport bojxona rejimiga joylashtirilayotganda, agar qonun hujjatlarida boshqacha tartib nazarda tutilmagan bo'lsa, tovarning ishlab chiqarilgan

mamlakatiga bog‘liq ravishda bojxona to‘lovlari va iqtisodiy siyosat choralari qo‘llaniladi.

Erkin ombor bojxona rejimiga joylashtirilgan va bojxona hududiga olib kiriladigan chet el tovariga nisbatan, agar qonun hujjatlarida boshqacha tartib nazarda tutilmagan bo‘lsa, ushbu tovar bevosita bojxona hududi tashqarisidan olib kirilganidagi kabi bojxona to‘lovlari va iqtisodiy siyosat choralari qo‘llaniladi.

O‘zbekiston tovari erkin ombordan bojxona hududidan tashqariga olib chiqilayotganda unga nisbatan bojxona hududidan olib chiqishda qo‘llanilganidagi kabi bojxona to‘lovlari va iqtisodiy siyosat choralari qo‘llaniladi.

Erkin ombordan bojxona hududidan tashqariga olib chiqiladigan tovarning kelib chiqishi to‘g‘risidagi sertifikat bo‘lmagan taqdirda bunday tovar unga bojxona to‘lovlari va iqtisodiy siyosat choralari qo‘llash maqsadida O‘zbekiston tovari sifatida, boshqa maqsadlarda esa, chet el tovari sifatida qaraladi.

Agar tovar olib chiqilayotganda bojxona bojlari va soliqlar to‘lashdan ozod etilishi yoki to‘langan summalar qaytarilishi nazarda tutilgan bo‘lsa, erkin ombor bojxona rejimiga joylashtiriladigan va O‘zbekiston Respublikasi hududidan tashqariga eksport bojxona rejimida olib chiqish mo‘ljallangan tovar bojxona bojlari va soliqlar to‘lashdan ozod etiladi yoki to‘langan summalar qaytariladi. Bunday tovarni olib chiqish bojxona bojlari, soliqlar summolari qaytarilgan yoki ularni to‘lashdan ozod qilingan kundan e‘tiboran olti oydan kechiktirmay amalga oshirilishi kerak.

Erkin omborlardan O‘zbekiston Respublikasi hududidan tashqariga olib chiqilishi lozim bo‘lgan tovar bojxona hududiga qaytarilgan yoki uni olib chiqish belgilangan muddatlar ichida amalga oshirilmagan taqdirda bojxona bojlari va soliqlar to‘lanadi.

